



**Sámi allaskuvla**

Sámi University of Applied Sciences

# SÁMI ALLASKUVLLA KVALITEHTASIHKARASTINVUOGÁDAT

Oppalaš oassi



Mearriduvvon Sámi allaskuvlla stivrras, S 09/11, 14.10.2011. Dohkkehuvvon dutkan- ja oahppostivrras 2.12.2019 áššis DOS 49/19. Dohkkehuvvon Sámi allaskuvlla stivrras 12.12.2019 áššis S-47-19.

## 1 Álgu

Universitehta- ja allaskuvláláhka § 1-6 gáibida ahte universitehtain ja allaskuvllain lea dohkálaš siskkáldas kvalitehtasihhkarastinvuogádat, mii sihkkarastá ja ovddida oahpuid kvalitehta. Gáibiduvvo maid ahte studeantaárvoštallamat leat oassin kvalitehtasihhkarastinvuogádagas. Universitehta- ja allaskuvlálága § 4-3. Oahppobiras (4) gáibida ahte ásahusa oahppobirasbargu dokumenterejuvvo ja lea oassin ásahusa siskkáldas kvalitehtasihhkarastinvuogádagas § 1-6 mielde.

Alitoahpu ja fágaskuvlaoahpu kvalitehtasihhkarastin ja kvalitehtaovdánahttin lánkaásahus, ja Alitoahpu oahppokvalitehta bearráigeahču lánkaásahus (studietilsynsforakriften) mearrida gáibádusaid systemáhtalaš kvalitehtabargui.

Kvalitehtasihhkarastinvuogádaga oppalaš oassi bidjá ulbmiliid ja rámmaid Sámi allaskuvlla kvalitehtasihhkarastinbarguide. Oppalaš oasis maiddá bohtá ovdan ovddasvástádus- ja bargojuohku kvalitehtasihhkarastimis.

Sámi allaskuvlla kvalitehtasihhkarastinvuogádat čilge Sámi allaskuvlla strategalaš ja systemáhtalaš kvalitehtabarggu. Vuogádat čilge dimenšuvnnaid mat leat oassin oahppodoaimmaid kvalitehtasihhkarastima barggus ja bargo- ja ovddasvástádusjuogu kvalitehtasihhkarastimis ja oahpuid hálddašeamis. Ossodagat galget ieža ráhkadit ossodagaid bargguid prosedyraid. Dát galget čuovvut oktasaš kvalitehtavuogádaga

Sámi allaskuvlla kvalitehtabargu lea vuodđuduvvon:

- Universitehta- ja allaskuvláláhkii
- Universitehta ja allaskuvlálága vuodđuduvvon guovddáš lánkaásahusaide
- NOKUT lánkaásahusaide kvalitehta ektui alit oahpus
- Standards and guidelines for quality assurance in the European Higher Education Area
- WINHEC kvalitehtamihtuide

Sámi allaskuvllas leat čuovvovaš stivrendokumeanttat mat maiddá leat vuodđun kvalitehtabargui:

- Strategiiaplána
- Ehtalaš rávvagat
- Ovdánahttinšiehtadus máhttodepartemeanttain
- Jahkasaš juolludanreivvet ja raporttat ja plánat

Sámi allaskuvlla kvalitehtabargu galgá vuodđuduvvon strategiiiii ja galgá gokčat buot mearkkašahhti beliid main lea dadjamuš studeanttaid oahppanjoksosiid kvalitehtii. Kvalitehtabargu galgá leat vuodđuduvvon ásahusa stivrii, jođiheapmái ja bargiide buot dásiin. Ásahus galgá kvalitehtabarggu bokte váikkuhit kvalitehtakultuvrra ovdánahttimii bargiid ja studeanttaid gaskkas.

Gođit ja ovttaskas fágabargit leat guovddázis barggus fállat studeanttaide oahpuid main lea alla fágalaš ja pedagogalaš dássi. Studeanttain lea maid guovddáš rolla kvalitehta ovdánahttimis, earenoamážit dán bokte go aktiivvalaččat servet oahppohusdoaimmaide ja go buktet konstruktiiivvalaš árvoštallamiid.

Kvalitehtasihhkarastinvuogádat sisttisdoallá doaimmaid mat gusket oahppokvalitehtii ja studeanttaid oahppobirrasii. Vuogádaga čilgehus guoská buot oahppofálaldagaide maid Sámi allaskuvla ovddasvástida:

- Oahppoovttadagaide
- Jahkeovttadagaide
- Bachelorprográmmaide
- Masterprográmmaide
- PhD-prográmmii
- Joatkka- ja lassioahpuide

## 2 Kvalitehtadimenšuvnnaid váldomihtut

Kvalitehtabargu sáhhtá konkretiserejuvvot guovddáš kvalitehtadimenšuvnnaid čilgemiin.

Kvalitehtadimenšuvnnaid galget sihkkarastit ahte Sámi allaskuvla bargá systemáhtalaččat ja viidát kvalitehtain.

Kvalitehtadimenšuvnnaid leat vuolggasadjin evalueremiidda, iskkademiide, raporteremiidda, suokkardallamiidda ja árvoštallamiidda.

Sámi allaskuvlla kvalitehtasihkkarastinvuogádagas leat dát kvalitehtadimenšuvnna, mat jahkásaččat raporterejuvvot dutkan- ja oahppostivrii, ja allaskuvlastivrii:

- Sisaváldinkvalitehta
- Oahppokvalitehta
- Eksámenkvalitehta
- Dutkankvalitehta
- Rámmakvalitehta
- Kvalitehta eamiálbmotásahussan

### *Kvalitehta eamiálbmotásahussan*

Rektoris, ásahusa bajimus jođiheaddjin, lea ovddasvástádus sihkkarastit ahte Sámi allaskuvlla doaimmat leat mielde doarjumin ulbmila leat njunuš sámi ja eamiálbmotásahus. Dát mielddisbuktá ahte WINHEC kvalitehtamihtut galget doaimma vuodđun. Goahtejođihedjii lea ovddasvástádus ahte iežaset fágagoađi oahpahus- ja dutkandoaimmat dorjot dán ulbmila.

### *Sisaváldinkvalitehta*

Sisaváldinkvalitehta guoská sihke formála gáibádusaide mat gusket sisaváldimii ja sisaváldima bohtosiidda. Buriin sisaváldinkvalitehtain oaivvilduvvo ahte Sámi allaskuvllas leat doarvái ohccit ja ahte ohcciin lea buorre dássi sin ovdalgihtii máhtolašvuodas.

Sámi allaskuvllas galgá leat buorre sisaváldinvuogádat mii fátmmasta proseassaid rekrutterema rájes gitta ođđa studeanttaid vuostávdimii. Sámi allaskuvla galgá sihkkarastit kvalitehta dieđuin mat raporterejuvvojit siskkáldasat ja olgguldasat. Sámi allaskuvla galgá systematiseret ja analyseret čoavddaloguid ja doaimmaide mat gullet studeantasisaváldimiidda.

### *Oahppokvalitehta*

Oahppokvalitehta guoská dilálašvuodaide mat váikkuhit studeanttaid oahppanprosessii, ja dakko bokte dasa man ávkkálaš oahppu lea studeanttaide. Oahppokvalitehta sisttisdoallá prográmmakvalitehta, oahpahuskvalitehta ja relevánssa sámi servvodaga dárbbuid ektui. Dát doibmet ovttas ja váikkuhit nubbi nubbái.

Sámi allaskuvllas galgá leat vuogádat mii sihkkarastá buori oahppokvalitehta. Guovddázis oahppokvalitehtas leat evalueremat, ja Sámi allaskuvllas galgá leat vuogádat oahppokvalitehta evalueremiidda iešguđet dásiin ja vuogádat dáid čuovvolahttimii.

### *Eksámenkvalitehta*

Eksámenkvalitehtii gullá studeanttaid oahppanávki ja oahpu relevánssa oahppoplána mihttomeriid, studeantta persovnnalaš ovdáneami ja čađaheami ektui. Sámi allaskuvla galgá bargat dan guvlui ahte nu olu studeanttat go vejolaččat ožžot buriid fágalaš bohtosiid ja čađahit oahpuid dábálaš oahppoáiggis. Sámi allaskuvla galgá čuovvut našunála ja báikkálaš eksámennjuolggadusaid.

Sámi allaskuvllas galget leat vuogádagat ja rutiinnat eksámena oktavuodas, ja sihkkarastit kvalitehta dain dieđuin mat raporterejuvvojit siskkáldasat ja olgguldasat. Ásahus galgá systematiseret ja analyseret čoavddaloguid mat gullet eksámenbohtosiidda.

#### *Dutkankvalitehta*

Dutkankvalitehta sisttisoallá dutkiid dieđalaš doaimmaid Sámi allaskuvllas ja dan ulbmil lea sihkkarastit systemáhtalaš vuhtiiváldima allaskuvlla dutkangelbbolašvuodas. Guovddázis dán kvalitehtadimenšuvnnas leat dutkanbohtosat. Sámi allaskuvla galgá láchit buori eavttuid dutkama álggaheapmái, čađaheapmái ja sihkkarastit dutkanbohtosiid almmuheami ja gaskkusteami servvodahkii. Sámi allaskuvla galgá maid bearráigeahččat ahte dutkanbohtosat bohtet ávkin Sámi allaskuvlla siskkáldas ovdáneapmái ja oahpahussii.

Sámi allaskuvllas galget leat doarjjadoaimmat mat dorjot buori jodiheami, oktiordnema ja raporterema ásahusa ollislaš dutkan- ja ovdánahttinbargguin. Ásahus galgá systematiseret ja analyseret čoavddaloguid ja doaimmaid mat gullet dutkamii.

#### *Rámmakvalitehta*

Sámi allaskuvla galgá fállat ođđaáigásaš vuodđostruktuvra, teknologijja ja bálvalusaid oahppo- ja dutkandoibmii. Sámi allaskuvllas galgá leat buorre ja beaktilis bargobiras mii joksá biddjojuvvon mihttomeriid. Geavaheddjiidguvllot- ja oassálastin, stabilitehta, beaktilvuolta ja bálvalankvalitehta leat dehálaš mihttomearit rámmakvalitehta buot osiide.

#### *Kvalitehta spiehkasteamit*

Spiehkasteapmi lea kvalitehtamihtuid váilevaš olaheapmi. Spiehkasteamit leat maid dilálašvuodát ja dáhpáhusat mat hehttejit Sámi allaskuvlla doalahit ja buoridit kvalitehta. Sámi allaskuvlla bargiin ja studeanttain lea ovddasvástádus dieđihit spiehkastemiid, spiehkastatvuogádaga bokte mii lea ásahuvvon dan váste. Dutkan- ja oahppostivrras lea ovddasvástádus dán vuogádahkii, ja dát galget raporterejuvvo dutkan- ja oahppostivrii ja allaskuvlastivrii jahkásaččat.

### 3 Sámi allaskuvlla kvalitehtasihkkarastinvuogádaga ulbmil ja huksehus

Sámi allaskuvlla kvalitehtasihkkarastinvuogádat galgá leat reaidun sihkkarastin dihte ahte Sámi allaskuvlla doaimmain lea alla kvalitehta ja ahte lea čađa gaskka kvalitehtaovdáneapmi.

Kvalitehtasihkkarastinvuogádat galgá leat reaidun duohtandahkat Sámi allaskuvlla ulbmila eamiálbmotásahussan mii seailluha ja ovddida sámegeiela, sámi kultuvrra ja servvodagaid. Allaskuvla galgá oahppofálaldagaidis bokte buvttadit kandidáhtaid geat oahpu bokte leat háhkan máhtu, dieđuid ja gelbbolašvuoda mat lea ávkkálaččat sihke studeanttaide alcceseaset ja sámi servodaga dárbuid ektui.

Sámi allaskuvlla mihttu lea ahte kvalitehtasihkkarastinvuogádat galgá:

- sihkkarastit oahpuin alla kvalitehta
- sihkkarastit buori oahppobirrasa studeanttaide
- sihkkarastit ahte studeanttat čađahit oahpuid áiggil buriid bohtosiiguin
- sihkkarastit ahte oahput ja kvalitehtabarggut devdet gáibádusaid lágain ja lálkaásahusain

Sihke bargit ja studeanttat galget dovdat ja oamastit kvalitehtasihkkarastinvuogádaga, ja searvat kvalitehtabargguide. Kvalitehtabargu galgá dokumenterejuvvot ja leat álki gávdnamis allaskuvlla birrasii. Kvalitehtasihkkarastinvuogádat galgá leat ealli vuogádat, mii čađagaskka ovdána. Kvalitehtasihkkarastinvuogádat galgá sihkkarastit ahte kvalitehtabargu doaibmá ja ahte fuomáša kvalitehtaspiehkastemiid.

Sámi allaskuvlla kvalitehtasihkkarastinvuogádat lea guovtti oasis, oppalaš oassi ja kvalitehtagiehtagirji. Dasa lassin leat prosedyrat maid iešguđet ossodagat ráhkadit. Oppalaš oassi lea stivrra mearridan vuodđodokumeanta mii oppalaččat čilge kvalitehtasihkkarastima ulbmiliid, aktevrraid ja ovddasvástádujuogu. Kvalitehtagiehtagirji čilge dárkileabbo ovddasvástádu- ja bargujuogu, relevántta dokumeanttaid/njuolggadusaid ja bargoproseassaid. Dása gullet maid prosedyračilgehusat, mat galget sihkkarastit ahte rutiinnat, mihttu ja ovddasvástádu- ja bargujuogut leat bures kvalitehtasihkkarastojuvvon ja vuodđuduvvon kvalitehtasihkkarastinvuogádahkii. Prosedyrat galget čilget barggu nu ahte lea vejolaš doaimmahit barggu dáinna čilgehusain.

[Oppalaš oassi, Sámi allaskuvlla stivra mearridan áššis S 09/11](#)



Oahppodoaimmaid kvalitehtagiehtagirji:  
čilge doaimmaid/áššegeainnuid, ovddasvástideddjiid, čađaheddjiid ja relevánta dokumeanttaid / njuolggadusaid.



Prosedyrat  
Vuodđuduvvon njuolggadusaid ja kvalitehtasihkkarastinvuogádahkii.  
Čilge siskkáldas doaimmaid mihttuid, ovddasvástádujuogu, prosedyraid ja bargujuogu, sihkkarastindihte buori kvalitehtasihkkarastima ja hálddašeami oahppodoaimmain

Kvalitehtasihhkarastinvuogádat galgá sihkkarastit ahte duhtada sihke siskkáldas ja olggobeale ášahusa kvalitehtagáibádusaid:

*Kvalitehtasihhkarastin studeanttaid hárrái*

Kvalitehtasihhkarastinvuogádat galgá sihkkarastit buori kvalitehta studeanttaid oahppama ja oahppobirrasa ektui ja buori kvalitehta studeantabálvalusaid dáfus. Vuogádat galgá čilget proseassaid ja rutiinnaid mat leat čatnon oahppanproseassaide ja oahppobirrasii, ja mat movttiidahttet studeanttaid searvat bargui.

*Kvalitehtasihhkarastin siskkáldasat ášahusas*

Vuogádat galgá leat mielde huksemin nana kvalitehtakultuvrra ja vuogáidahttit proseassaid ja rutiinnaid nu ahte sihkkarastá buori resursageavaheami, ja ahte olaha plánejuvvon mihtuid

*Kvalitehtasihhkarastin olggobeale ášahusa gáibádusaid ektui*

Kvalitehtasihhkarastinvuogádat galgá oahpuid ulbmiliid, sisdoalu ja vugiid ovddidit nu ahte duhtadit servvodaga dárbbuid ja sihkkarastá oahpuid relevánsa. Vuogádat galgá sihkkarastit ahte Sámi allaskuvla čuovvu lágaid ja njuolggadusaid ja muđui eiseválddiid gáibádusaid ja vuordámušaid.


*Kvalitehtasihhkarastin eamiálbmotásahussan*

Sámi allaskuvla galgá leat mielde gokčamin sámi servvodagaid dárbbuid dutkamii ja oahpu hárrái, iežas fágalaš profiila siskkobealde. Sámi allaskuvlla doaibma galgá čuovvut ja oasálastit eamiálbmogiid oahpahusa ja dutkama ovdáneapmái, ja čuovvut WINHEC kvalitehtamihtuid dutkan- ja oahpahusdoaimmain. Sámi allaskuvla galgá doaimmas bokte váikkuhit dasa ahte dieđalaš máhttu huksejuvvo árbevirolaš kultuvrra ja luondduipmárdusa ala, ja sihkkarastit ahte doaimma bohtosat gaskkustuvvojit servvodahkii.

#### 4 Organiseren ja ovddasvástádus

Sámi allaskuvlla kvalitetavuogádat lea vuodđuduvvon allaskuvlla organisašuvdnii. Lea dehálaš ahte lea čielga ovddasvástádusjuohku organisašuvnnas, muhto seammás galgá olles organisašuvdna searvat ovdánahttinbarguide.

Sámi allaskuvla organisašuvdnakárta:



#### Sámi allaskuvlla jođiheapmi

Oahppokvalitehtabargu lea mielde Sámi allaskuvlla ollislaš jođiheamis, masa earret eará gullet:

- risikostivren
- bušeahhta ja bušeahttajuohku
- plánadokumeanttat
- raporteren
- beaivválaš jođiheapmi

Risikostivren lea integrerejuvvon oassi doaibmastivremis allaskuvllas. Risikostivrema bokte identifiserejuvot fáktorat mat sáhttet mielddisbuktit ahte kvalitehtabarggu mihtut eai olahuvvo, dáid váikkuhusat ja áigeguovdilis doaimmaid evalueren. Risikoárvoštallan addá vuodá oahppokvalitehtabarggu vuoruhemiide ja buorideapmái.

Bušeahhtašiehtadallamiin, allaskuvlla jođihangotti ja ossodagaid gulahallama bokte čadnojuvvojit resurssaid vuoruheamit ja oahppokvalitehta oktii.

#### 4.1 Stivrrat, lávdegottit ja guovddáš rollat kvalitehtabarggus

Dás vuollelis leat čilgejuvvon rollat ja ovddasvástádusat kvalitehtabarggus. Konkrehta barggut ja aktivitehtat leat čilgejuvvon kvalitehtagiehtagirjijis, instruvssain, prosedyrain ja bargosisdoaluin. Juohke ovttas lea ovddasvástádus oasálastit aktiivvalaččat kvalitehtabargui ja ovddidit kvalitehtakultuvrra iežas ossodagas.

<b>Rolla</b>	<b>Ovddasvástádus</b>
<b>Allaskuvlastivra</b>	<p>Allaskuvlastivra lea allaskuvla bajimus stivrenorgána, mas lea bajimus ovddasvástádus kvalitehtasihkkarastimii Sámi allaskuvllas. Das lea ovddasvástádus ahte ásahusa dásis lea alla kvalitehta ja ahte beaktilit ja gustojeaddji lágaid, lánkaásahusaid ja njuolggadusaid mielde, ja daid rámmaid ja mihtuid mielde maid bajit eiseválddit addet.</p> <p>Sámi allaskuvla stivra mearrida kvalitehtasihkkarastinvuogádaga oppalaš oasi, ja mearrida dán bokte oppalaš rámmaid Sámi allaskuvlla kvalitehtasihkkarastinbargguide. Sámi allaskuvlastivra meannuda jahkásaččat kvalitehtaraportta, mii addá ollislaš gova Sámi allaskuvlla kvalitehtasihkkarastindoaimmain ja kvalitehtaovdáneamis. Stivra dohkkeha ja rievdata strategijaid ja doaibmaplánaid, buktá stivrensignálaid kvalitehtasihkkarastinbargui, ja dohkkeha ja rievdata lánkaásahusaid.</p>
<b>Rektor</b>	<p>Rektor lea ásahusa bajimus fágalaš jodiheaddji ja stivrajodiheaddji. Rektoris lea, stivrajodiheami olis, bajimus ovddasvástádus ja jodiheapmi ásahusa doaimmas ja dán gozihit. Rektor galgá stivrra ovddas earenoamážit bargat dan ovdii ahte stivrra ovddasvástádus fágalaš doaimmas doallá alla kvalitehta. Rektor galgá deattuhit fágalaš doaimma jodiheami, earret eará dan bokte ahte doaibmá movttiidahttin ja vuolggaheddjin, muhto maddái dan bokte ahte čuovvola vejolaš kvalitehtaváilevuodaid.</p>
<b>Direktevra</b>	<p>Allaskuvladirektevra lea ásahusa alimus hálddahušlašjodiheaddji, daid rámmaid vuodul maid allaskuvlastivra ja departemeanta mearrideaba. Direktivras lea ovddasvástádus dasa ahte kvalitehtasihkkarastinvuogádat doaibmá ulbmiliid mielde, ja ahte kvalitehtabarggut čađahuvvojit, ja ahte kvalitehtabarggut jahkásaččat árvoštallojuvvojit ja raporterejuvvojit stivrii. Allaskuvladirektivras lea bajitdási ovddasvástádus buot hálddahušlaš ovttagaid kvalitehtasihkkarastinbargguide. Direktivra raportere njuolgut allaskuvlla stivrii. Allaskuvladirektevra lea stivrra čáli ja galgá ovttasrádiid rektoriin gárvvistit ja buktit árvalusaid áššiide mat biddjojit stivrra ovdii. Hálddahušsodagat gullet direktivrra vuollái ja sis lea ovddasvástádus áimmahuššat iešguđet osiid kvalitehtasihkkarastinbarggus.</p>
<b>Dutkan- ja oahppostivra</b>	<p>Dutkan- ja oahppostivrras (DOS) lea sihke ráđđeaddidoaimma ja mearridanváldi allaskuvlastivrra delegašuvnna vuodul. DOS doaibmá jahkásaš bušeahhtarámmaid siskobealde maid allaskuvlastivra ásaha.</p> <p>DOS:s galgá leat strategalaš rolla sihke guhkit ja oanehit geahčastagain. Dat galgá earenoamážit gozihit ahte Sámi allaskuvlla dutkan- ja oahppodoaimmat dollet daid kvalitehtagáibádusaid mat áiggis áigái ásahussii biddjojit.</p> <p>DOS galgá sihkkarastit kvalitehta ja kvalitehtasihkkarastinortnegiid Sámi allaskuvlla doaimmain. DOS mearrida dárkileabbo kvalitehtamihtuid ja ortnegiid daid iešguđet kvalitehtadimenšuvnnaide mat gusket oahpuide ja dutkamii. DOS galgá gozihit fágalaš birrasa, oahppobirrasa ja doarjjadoaimmaid kvalitehta. DOS mearrida ja ođasmahtta evaluerenvuogádaga ja -ortnegiid mat leat oassin kvalitehtasihkkarastinvuogádagas, ja mearrida dárkilat njuolggadusaid allaskuvlla iežas lánkaásahusaide mat gullet oahpuide ja dutkamii</p>



	DOS oktiibidjama ja mandáhta gávnnat <a href="#">dás</a> .
<b>Oahppobiraslávdegoddi</b>	Oahppobiraslávdegoddi galgá leat mielde váikkuheame dasa ahte Universitehta- ja allaskuvlálága mearrádušat čađahuvvojit. Oahppobiraslávdegoddi galgá sihkkarastit ahte studeanttat besset mielde mearrideames áššiid mat gusket oahppobirrasii. Lávdegoddi galgá oassálastit oahppobirrasii guoskevaš doaimmaid plánemis ja čuovvut dárkilit mielde áššiid ovdáneami mat gusket studeanttaid sihkarvuhtii ja čálgui. Oahppobiraslávdegoddi galgá oažžut dieđu oahppobirrasii guoskevaš váidagiid birra maid oahppoásahus oažžu studeanttain. Lávdegoddi sáhtta buktit cealkámuša dáid diliid birra. Lávdegoddái galget dieđihuvvot gohččumat ja eará eanjkilmearrádušat maid bargobearráigeahčču dahká. Lávdegoddi raportere njuolga stivrii ja galgá jahkásaččat buktit raportta ásahusa oahppobirasbarggu birra. Studeanttain ja ásahusas galget seamma olu lahtut lávdegottis. Oahppobiraslávdegoddi birra gávnnat eambo dieđuid <a href="#">dás</a> .
<b>Goahtejođiheadjit</b>	Goahtejođiheadjit jođihit Sámi allaskuvlla fágalaš ovttagaid, fágagođiid. Goahtejođiheadjis lea bajitdási ovddasvástáduš buot goađi oahppo-, dutkan- ja ovdánahttindoaimmaide, ja ahte goahti ovdána strategijaid, mihtuid ja mearrádušaid mielde. Dán ovddasvástádušii gullá earret eará goađi oahppofálaldagat ja dutkan- ja ovdánahttindoaimmat devdet gustovaš kvalitehtagáibádušaid. Goahtejođiheadjis lea ovddasvástáduš čuovvolahttit ja ovddidit kvalitehtasihkkarastinbarguid iežas fágagoađis
<b>Oahppoprográmmajođiheadji</b>	<p>Prográmmajođiheadjis lea ovddasvástáduš oahppoprográmma kvalitehtasihkkarastimii ja ovdánahttimii. Sus lea maid ovddasvástáduš oahppoprográmma fágalaš ja pedagogaš jođihepmái ja organiseremii. Son galgá ovdánahttit oahppoprográmma fágalaš sisdoalu, profiilla ja relevánsa, ja sihkkarastit prográmmii fágalaš ollislašvuoda ja fágalaš čieknudeami. Son galgá maid sihkkarastit ahte oahppoprográmma oahppanjoksosat vástidit prográmma fágalaš ulbmiliidda, ja ahte oahppoovttadagat vástidit prográmmaplána oahppanjoksosiidda, ja initieret ja koordineret oahppoovttadagaid evalueremiid ja revideremii, ja jođihit prográmma ollislaš evaluerema ja ođasmahttima.</p> <p>Oahppoprográmmajođiheadji galgá sihkkarastit gulahallama fágabirrasiin, áimmahuššat ahte oahppoprográmma lea dutkanvuđot, ovttas goahtejođiheddjiin sihkkarastit ahte prográmmas lea nana fágabiras ja doarvái fágaolbmot, ja sihkkarastit ahte oahppoprográmmas leat internašunaliserenortnegat.</p>
<b>Oahpaheadjeoahpuid prográmma ja hárhallama fágalaš jođiheadji</b>	<p>Juohke oahpaheadjeoahppoprográmmii nammaduvvo fágalaš jođiheadji, gii goziha ja sihkkarastá oahpu fágalaš kvalitehta. Son galgá dovdat našunála prográmmaplánaid rámmaplánalahkaásahusaid fágalaš mihtuid ja gáibádušaid. Son goziha oahpu fágalaččat ja láhkaásahusa, njuolggadusaid, prográmmaplána ja fágaplánaid ektui veahkkín oahppojođiheadjái. Son initiere, ovddida ođastandárbbuid prográmmaplánaide ja fágaplánaide ja organisere dáid nu ahte doaimmahuvvet. Son lohka fágareporttaid ja árvvoštallá ja buktá ovdan oainnuid dáid ektui, vejolaš nannenstrategijaid.</p> <p>Hárhallamiidda várrejuvvo sierra fágalaš jođiheadji, geas lea fágalaš váldoovddasvástáduš hárhallanoahpahussii ja čuovvola prográmmaplánaid hárhallanmihtuid. Son goziha hárhallama strategalaččat ja fágalaččat láhkaásahusa, njuolggadusaid, prográmmaplánaid ja hárhallanplánaid ektui.</p>
<b>Oahpaheadjeoahpuid oahppojođiheadji</b>	Oahpaheadjeoahpuid oahppojođiheadji jođiha oahpaheadjeoahpuid oppalaččat, strategalaš dásis ja guhkesáiggeplánaid ektui ovttas goahtejođiheddjiin, praktihkalaš dásis beaivválaččat ja oahpaheadjeoahpuid váldoteama. Son lea doarjjan resursaplánemis, pláne oahpaheadjeoahpuid sierra bušehta ja doaimmaid, sihkkarastá ja čuovvola studeantaprogrešuvnnaid ovttas luohkkákoordinátoriiguin ja hálddahusain, earenoamážit ahte devdet

	rámmaplánaláhkaásahusa. Goziha ahte kvalitehtasihkkarastinvuogádat doaibmá ja váldá vára studeanttaid kvalitehtasihkkarastimis.
<b>Oahppo-/ fága- /máhttoviidodatkoordináhtor</b>	Juohke oahpus galgá leat sierra oahppokoordináhtor. Oahppokoordináhtor čadaha earret eará studeantaárvoštallamiid, ságastallamiid progresuvnna čuovvohathtimin ja buoridandoaimmaid. Son čállá maid fága- ja spiehkastatraporttaid, ja árvala buoridandoaimmaid. Oahppokoordináhtoris lea váldoovddasvástádus árvoštallamiidda ja eksámeniidda.
<b>Oahpaheaddji</b>	Oahpaheaddjit galget hábmet ja čadahit oahpahus- ja oahppanaktivitehtaid mat addet studeanttaide vuođu olahit oahpu oahppanjoksošiid. Sis lea lagas gulahallan studeanttaiguin ja sis lea erenoamáš ovddasvástádus čuovvulahttit kvalitehtabarggu oahpus.
<b>Oahppo- ja dutkanhálddahus</b>	Oahppohoavddas, Dutkan- ja oahppohálddahus, lea operašunealla ovddasvástádus kvalitehtasihkkarastinvuogádaga doaimmaheapmái ja ođasmahttimii. Oahppohoavddas lea ovddasvástádus hálddahuslaš láhčit dili sisaváldin-, oahppo-, eksámen-, ja dutkanhálddahus, lagas ovttasbargguin goahtejođiheddjiiguin. Oahppo- ja dutkanhálddahus ovddasvástida maid láhčit dili studeanttaid mielváikkuhanvejolašvuhtii ja maid čuovvulahttit studeanttaid.
<b>Hálddahuslaš ovttadagat</b>	Hálddahuslaš ovttadagaid jođiheddjiin (gaskajođiheaddjit) lea ovddasvástádus iežaset ovttadagaid kvalitehtabargguide ja ovdáneapmái.  Teknologiija- ja doaibmaossodat ovddasvástida sisagaikun- ja buollinsihkarvuoda, ja bálvleami fállat studeanttaide áššiin mat gusket teknologalaš rusttegiidda ja mat leat dárbbaslaš čadaha oahpu čadahaheapmái. Ossodat galgá leat mielde ovdánahttime teknologiija ja digitála bargovugiid mat dorjot Sámi allaskuvlla olahit iežas strategalaš mihtuid ja ulbmiliid. Dása gullá earret eará ovddasvástádus jođihit fágaid- ja ossodatrasttildeaddji ovdánahttinbargguide, ja sihkkarastit ahte dutkiide, oahpaheddjiide ja hálddahusbargiide fállonjuovvot ja oahpahuovvot ođđa teknologiijačovdosat.  Girjerájus ovddasvástida ahte studeanttain leat báberhámat ja elektrovnnalaš oahppo- ja diehtoresurssat olámuttos, ja ahte fysalaš ja elektrovnnalaš fasiliatehtat leat áigeovuodilat ja doaibmi, ja ahte studeanttat ožžot bagadeami girjerádjosa resurssaid geavaheamis.
<b>Bargit</b>	Bargit galget váldit ovddasvástádusa iežaset barggu kvalitehtii. Bargit galget čadat bargat iežaset kvalitehtabuoridemiin ja beaktivilvuodain.
<b>Studeantaáittardeaddji</b>	Sámi allaskuvllas lea ovttasbargu UiT Norgga árktaš universitehtain studeantaáittardeaddji ektui. Studeanttaidáittardeaddji lea iešmearrideaddji veahkeheaddji gii veahkeha ja bagada studeanttaid áššiin mat gusket sin oahppodilálašvuhtii. Studeanttaidáittardeaddji galgá bearráigeahččat ahte áššit ožžot dohkálaš ja rievttis gieđahallama, ja ahte studeanttaid vuoigatvuodát vállojuvvojit vuhtii. Studeanttaidáittardeaddjis lea jávohisvuodageasku, ja son beassá dušše geahččat dokumeanttaid maid studeanttat ieža addet sutnje. Studeanttat sáhttet dan dihte leat oadjebasat ahte buot oktavuodát leat guovttigaskasaš oktavuodát, jus ii leat šiehtadan maidege eará. Studeantaáittardeaddji sáhtta guldalit studeantta vuorjašumiid ja bagadit váttes dilálašvuodain, iskat čuovvugo Sámi allaskuvla gustovaš lágaid ja njuolggadusaid, leat mielde čoavdime ášši nu vuollegis dásis go vejolaš, leat bealátkeahkes ja iešmearrideaddji ásahus áššeosálaččaid gaskkas jus čuožžila nággu ja čilget studeanttaid vuoigatvuodaid ja geatnegasvuodaid. Studeantaáittardeaddji birra gávnnat eambo dieđuid dás.
<b>Studeanttat</b>	Studeanttain lea ovddasvástádus iežaset oahppamii. Studeanttain lea maid ovddasvástádus aktiivvalaččat searvat oahppobirrasa ja oahpuid ovddideapmái ja buorideapmái. Studeanttain lea ovddasvástádus searvat árvoštallamiidda mat leat oassin kvalitehtasihkkarastinvuogádagas.

<b>Studeantastivra</b>	Studeantastivra lea Sámi allaskuvlla studeanttaid bajimus orgána, ja das lea váikkuhanvejolašvuohta buot áššiide mat gullet allaskuvlla studeanttaide. Studeantastivra bargá studeanttaid ovddas fágalaš áššiiguin, ja galgá nannet ja buoridit studeanttaid oahppo- ja sosiálalašbirrasa. Studeantastivra ovddida studeanttaid oainnuid ja beroštumiid Sámi allaskuvlla stivrii ja eará lávdegottiide. Stivra lea gulaskuddanorgána buot áššiide mat gusket studeanttaide. Studeantastivrra birra gávnnat eambo dieđuid <a href="#">dás</a> .
<b>Dohkálašvuođalávdegoddi</b>	Dohkálašvuođaarvvoštallan galgá čielggadit leatgo studeanttas dárbbalaš eavttut ámmáha doaimmaheapmái. Studeanta guhte lea vejolaš vahágin pasieanttaid, geavaheddjiid, mánáidgárdemánáid, ohppiid dahje earáid geainna boahtá oktavuhtii hárhallamis dahje boahttevaš ámmátuoimmas, eallimii, fysalaš ja psyhkalaš dearvvašvuhtii, vuoigatvuođaide ja sihkarvuhtii, ii leat dohkálaš ámmáhii. Dohkálašvuođalávdegoddi galgá meannudit dohkálašvuođaaššiid maid ásaovddasvástideaddji ovddida, ja ráhkadit mearrádusárvalusa dohkálašvuođaaššiin allaskuvlla váiddalávdegoddá. Dohkálašvuođalávdegotti birra gávnnat eambo dieđuid <a href="#">dás</a> .
<b>Váiddalávdegoddi</b>	Váiddalávdegoddi galgá meannudit eanjkilmearrádusaid váidagiid ja stivrra mearrádusa mielde, kandidáhtaid eará váiddaáššiid. Váiddalávdegotti birra gávnnat eambo dieđuid <a href="#">dás</a> .
<b>Sámegiela ja sámi girjjálašvuođa doavttergráda prográmmastivra</b>	Sámegiela ja sámi girjjálašvuođa doavttergráda prográmmastivra čadaha ohcciid sisaváldima doavttirgrádaohppui ja čuovvola doavttirgrádaprogámma studeantaáššiid. Prográmmastivra ovddida bagadallinammadeami evttohusaid goahtejođiheaddjái ja ovddida PhD-ohppui guoskevaš áššiid goahtejođiheaddji bokte dutkan- ja oahppostivrii. Prográmmastivra galgá searválaga bagadalliiguin sihkarastit ahte doavttirgrádahasat osálastet aktiivvalaččat dutkanbirrasiin ja sáhtta dárbbu mielde gáibidit doavttirgrádahasas erenoamáš raporterema jus lea váilevaš ovdáneapmi prošeaktačilgehusa ektui. Jus doavttirgrádstudeanta áigu váldit oahppooasi eará ásaovddas, ferte prográmmastivra mearridit leago oahppooassi PhD fágalaš dásis.  Sámegiela ja sámi girjjálašvuođa doavttergráda prográmmastivrra birra gávnnat eambo dieđuid <a href="#">dás</a> .
<b>Sisaheivehanlávdegoddi</b>	Sisaheivehanlávdegoddi meannuda ohcamiid mat gusket oahpuid, sihke olgoriikka ja Norgga, fágalaš dohkkeheapmái ja sisaheiveheapmái, ja maidái ohcamiid mat gusket fágain/oahpuin beassamii. Olgoriikka oahpu dási ja viidodaga mearrideamis galgá NOKUT:ain ráđđádallojuvot. Sisaheivehanlávdegotti birra gávnnat eambo dieđuid <a href="#">dás</a> .

## 5 Evalueren ja kvalitehtaovdáneapmi

Sámi allaskuvllas lea mihttun fállat oahpuid maid fágalaš ja pedagogalaš kvalitehta vástida našuvnnalaš ja internašunála gáibádusaide ja dássái. Allaskuvlla oahppofálaldagaid kvalitehta galgá jámma ja systemáhtalččat evaluerejuvvot, nu ahte dollet alla riikkaidgaskasaš fágalaš dási, leat áigejuovdilis servodatrelevánttat ja ahte oahpahus lea dohkkehuvvon dieđalaš, dáiddafágalaš, pedagogalaš ja ehtalaš prinsihpaid mielde.

Dán dihte lea dehálaš ahte allaskuvlla fágagoađit ja prográmmastivra láchčēt dili nu ahte evaluerenbargu ja dáid čuovvoleapmi lea bures vuodđuduvvon allaskuvlla doaimmas. Sihke studeanttat, fágabargit ja servodat- ja bargoeallima aktevrat sáhtte čađahit evalueremiid. Evalueremat addet studeanttaide aktiivvalaš rolla kvalitehtabarggus, addá stuorát fuomášumi studeanttaid oahppobirrasii ja oahppokvalitehta vuodđudanbargui fágabirrasiin. Evalueren lea oassin studeanttaid oahppanproseassas ja fágabirrasiid iešárvoštallamis. Gođiin lea evaluerema bajimus ovddasvástáduš.

Oahpuid buoridanbargu lea čađat jođus. Studeanttaid vejolašvuohta buktit oaiviliiddiset oahpuid ja oahppodoaimmaid kvalitehta ektui galgá sihkarastojuvvot. Olu evalueremat addojit beaivválaččat studeantta ja bargi gulahallama bokte, mii addá vejolašvuođa jođánit čuovvolahttit evalueremiid. Buoridandáhttu berre leat guovddázis studeantta ja bargi beaivválaš gulahallamis. Lassin galgá systemáhtalaččat vižžojuvvot diehtu makkárin studeanttat ja fágabargit árvvoštallet oahppokvalitehta leat. Iešguđet evalueremat ollašuttet guovddáš osiid allaskuvlla kvalitehtabarggus ja buktet dieđuid iešguđet dimenšuvnnain ásahasas.

Evalueren oppalaččat:

- Evalueremat galget dokumenterejuvvot ja bohtosiid čuovvoleapmái galget leat rutiinnat
- Bohtosat galget čoaškkáigessot, árvvoštallojuvvot ja kommenterejuvvot ovdal almmuhuvvojit
- Bohtosat ja plánejuvvon čuovvolahttin galgá dieđihuvvot studeanttaide geat leat oassálasten guoskevaš evalueremii(dda).

Buot oahput berrejit evaluerejuvvot ovdal oahppu loahpahuvvo ja áinnas oahpu gaskkamuttus. Evalueremat oahpu čađahettiin dahká álkibun bidjat doaimmaid johtui dan botta studeanttat áin oassálastet guoskevaš oahpu oahppodoaimmaide. Dákkár evalueremat sáhttet dasa lassin movttiidahttit studeanttaid eambo searvat evalueremiidda, go oidnet ávkki dás ovdal oahppu loahpahuvvo.

**Oahppoprográmma evalueren:**

### **Oahppoprográmmaid jahkásaš evalueren**

**Ovddasvástideaddji:** Prográmmajođiheaddji/ Oahpaheadjeoahppoprográmmaid fágalaš jođiheaddji

**Gáibádušat:** Prográmmaevalueremat galget čađahuvvot jahkásaččat. Ávžžuuvvo čađahit njálmmálaš evaluerema masa prográmmajođiheaddji, oahpaheadjit čadnon ohppui ja studeanttat oasálastet. Jus dakkár čađahanvuohki ii sáhte adnot (omd. neahttaoahpuin), de sáhtá čálalaš vuohki geavahuvvot. Evalueren ferte dokumenterejuvvot čálalaččat.

**Fáddá:** Evalueremis galget leat fáttát mat leat relevánttat prográmmakvalitehtii, nu mo ovdamearkka dihte ovttagaid oktiibidjan ja fágalaš čiekŋudeapmi, studeanttaid oahppobiras, studeanttaid iešáŋgirusšan, oppalaš bargohivvodat, leatgo oahpahus,- oahppan- ja árvvoštallanvuogit heivehuvvon oahpu oahppanjoksosiid olaheapmái, olgoriikaorron, dieđut oahpu ja oahpu hálldašeami birra ja oahpu relevánsa.

**Rutiidna:** Bohtosiid analisa ovdanbuktá prográmmajođiheaddji fágareporttas oktan iežas evalueremiin. Goahtejođiheaddji manná čađa ja árvvoštallá evalueremiid gávdnosiid. Dutkan- ja oahppostivra sáhtá mearridit ahte allaskuvla galgá čađahit stuorát árvvoštallamiid prográmmain go leat unnimusat guokte joavkku (kulla) čađahan oahpu. Sierra mála geavahuvvo dása.

## Oahppovttadagaid evalueren

Buot oahppovttadagat galget evaluerejuvvot unnimusat oktii juohke goalmmát jagi. Go ođđa oahppovttadat biddjo johtui de galgá álo čađahuvvot evalueren. Oahppovttadagat mat eai fállujuvvo juohke jagi árvvoštallojuvvot unnimusat juohke goalmmát háve go čađahuvvo. Studeanttaid evalueren ja koordináhtora evalueren addá vuođu fágaraportii, maid koordináhtor hábme ja sádde oahppohálddahussii. Fágaraporta dieđut dolvojuvvot kvalitehtaraportii mii dolvojuvvo dutkan- ja oahppostivrii ja allaskuvlastivrii jahkásaččat.

### Studeanttaid evalueren

**Ovddasvástideaddji:** Oahppo-/ fága-/máhttoviidodatkoordináhtor

**Gáibádusat:** Studeanttaid evalueremat čađahuvvojit guoskevaš lohkanbajis, jogo oahpu loahpas dahje gaskkamuttus. Evalueren galgá leat čálalaš.

**Fáddá:** Evalueremiin studeanttat besset buktit oaiviliiddiset mat leat relevánttat oahpu kvalitehtii. Buot oasis oahpus galget evaluerejuvvot. Fáttát sáhttet ovdamearkka dihte leat oahppobiras, oahpahu-, oahppan- ja árvvoštallanvuogit, iežas ángiruššan ja eavttut oahpu čađaheapmái, hárhjhallanáigodat, oahppanjokosot, oahpu čađaheapmi ja organiseren ja lohkanmearri.

**Rutiidna ja mála:** Koordináhtor bidjá johtui evaluerema ja čohkke bohtosiid. Bohtosiid analysa ovdanbukta koordináhtor fágaraporttas oktan iežas evalueremiin. Sierra mála geavahuvvo dása.



### Oahppovttadaga koordináhtora evalueren - Fágaraporta

**Ovddasvástideaddji:** Oahppo-/ fága-/máhttoviidodatkoordináhtor

**Gáibádusat:** Koordináhtorat galget buktit čálalaš evaluerema, mii čađahuvvo manjel studeanttaid evaluerema ja manjel bargogáibádusaid ja eksámena čađaheami.

**Fáddá:** Koordináhtora evalueren áššiin main lea dadjamuš oahpu kvalitehtii, nu mo ovdamearkka dihte studeanttaid fágalaš eavttut čađahit oahpu, bargohivvodat, oahpahu-, oahppo- ja árvvoštallanvuogiid relevánsa oahppanjokososiid ektui, oahppobiras, studeanttaid- ja koordináhtora ángiruššan ja kvalitehtabuorideami doaimmaide evttohus.

**Rutiidna ja mála:** Koordináhtor váldá vuođu studeanttaid evalueremis ja iežas evalueremis maiguin hábme fágaraportta, mii sáddejuvvo oahppohálddahussii. Fágaraporta lea oassin kvalitehtaraporttas mii dolvojuvvo dutkan- ja oahppostivrii, ja allaskuvlastivrii jahkásaččat. Fágaraportta mála geavahuvvo dása.

**Eará evalueremat ja iskkadeamit:**

- **Studiebarometeret**

Jahkásaš našunála iskkadeapmi buot 2.-ja 5. jagi studeanttaide. NOKUT čađaha dán iskkadeami golggotmánus juohke jagi. Oahppo- ja dutkanhálddahus koordinere čuovolahttima.

- **Kandidáhttaiskkadeamit**

Iskkadeamit mat sáddejuvvojit kandidáhtaide geat leat gárven oahpu seamma jagi. Oahppo- ja dutkanhálddahus sádde iskkadeami neahta bokte masteroahpu kandidáhtaide. Bohto sáddejuvvojit guoskevaš gohtái ja oahpu prográmmajođiheaddjái, geat čuovvolit fágalaš beliid. Ossodagat/bálvalusguovddážit čuovvolit osiid mat sidjiide gullet

- **Studeantabirasiskkadeapmi**

Sáddejuvvo loahpas giđđalohkanbaji sihke čakča- ja giđđalohkanbaji studeanttaide. Fáddá lea sihke fága kvalitehta, oahppobiras, čálgofáldagat, ja muđui studeantabiras (girjerájus, IT-ossodat, oahppohálddahus jna.). Oahppo- ja dutkanhálddahus sádde iskkadeami neahta bokte. Bohtosat addojit guoskevaš ossodagaide ja gođiide. Gođit čuovvolit fágalaš beali ja ossodagat/bálvalusguovddážit čuovvolit osiid mat sidjiide gullet.

- **Hárjehallamiidda guoskevaš evalueremat**

Hárjehallanevalueren lea guovtti oasis; studeantta evalueren ja hárjehallanbáikki evalueren. Dáidda leat sierra skovit, maid gohti čohkke ja čuovolahtte. Guoskevaš gohti ovddasvástida čuovolahttima.

- **Siskkáldas iskkadeamit**

Eanjkiliskkadeamit mat biddjojit johtui allaskuvlla bealis jus orro dárbu. Sáhttet leat áššit main dárbbahuvvo liige evalueren, jus ovdamearkka dihte leat čuožžilan erenoamáš dilid. Ossodat dahje gohti mii bidjá johtui evaluerema ovddasvástida čuovolahttima.

- **Oahppoprográmmaid áigodatlaš evalueren (olgguldasevalueren)**

Áigodatlaš evalueremat galgá sihkkarastit ahte oahppoprográmmat dollet alla kvalitehta ja čuvvot gustovaš njuolggadusaid. Servodat- ja bargoeallinrelevánša ja strategalaš vuođđudeapmi galgá maid árvoštallojuvvo. Evalueren lea oassin kvalitehtasihkkarastinvuogádagas ja oahpuid kvalitehtaovdánahttimis, ja galgá čađahuvvot juohke guđat jagi. Oahpuin mat eai álggahuvvo juohke jagi sáhtta guhkit áigodat árvoštallojuvvo, dan ektui mii addá buoremus kvalitehtaovdánahttima. Dutkan- ja oahppostivra sáhtta mearridit ahte galgá čađahuvvot evalueren. Olgguldasevalueremii gohti evttoha mandáhta áššedovdilávdegoddái ja ráhkada plána evalueremiidda. Dutkan- ja oahppostivra dohkkeha loahpalaš mandáhta. Evalueren sáhtta čađahuvvot dušše čálalaš dokumentašuvvna vuođul dahje čálalaš dokumentašuvvna ja jearahallamiid vuođul. Lávdegottis galget unnimusat golbma lahtu, okta mas unnimusat vuosttašvirgegelbbolašvuohta, okta norgga universitehtas dahje allaskuvllas, ja okta geas lea čanastupmi oahpu ámmátsuorgái. Evalueremat galget dokumenterejuvvo ja bohtosat galget leat almmolaččat, jus jávohisvuođageatnegasvuođamearrádusat eai hehte dan. Guoskevaš gohti ovddasvástida čuovolahttima.

## **Čoavddalogut**

Lassin evalueremiid ja iskkademiid bohtosiid analysaide, de leat olu fásta čoavddalogut mat addet čielga gova iešguđet kvalitehtadimenšuvnnain. Čoavddaloguid viežžat earret eará DBH:s (Database for statistikk om høyere utdanning). Dát leat gávdnamis DBH neahttašiidus, raporteremiid maŋŋel. Čoavddaloguin leat dieđut earret eará studeantarekruterema, sisaváldima, internašunaliserema, kandidáhtaid čađaheami ja studeanttaid heaitima birra. Dát logut addet buori vuođu kvalitehtaraportii mii dolvojuvvo dutkan- ja oahppostivrii ja allaskuvlastivrii jahkásaččat.

## **Responsa**

Studeanttain galgá áiggis áigái leat vejolašvuohta dieđihit mo sii vásihit oahppokvalitehta ja oahppobirrasa. Studeanttat sáhttet buktit dákkár dieđuid evalueremiid oktavuodas dahje njuolga gohtái,

prográmmajođiheadjái, koordináhtorii dahje oahppohálddahussii. Jus studeanta ii hálit buktit dákkár dieđuid namainis, de sáhhtá dáid buktit anonyman.

Sámi allaskuvlla ruovttusiiddus lea vejolašvuhta dákkár dieđuid buktit elektrovnnalaččat. Dáppe lea vejolašvuhta rámidit ja dieđihit spiehkastemiid. Ossodagat maidda dieđiheamit gusket ovddasvástit dáid dieđuid čuovvoleami ja studeanttaide dieđuid addima čuovvolahttima birra.

## 6 Oahppokvalitehta analysa ja čuovvolahttin

Sámi allaskuvlla oahppokvalitehta mihtut leat vuolggasadjin analysaide ja čuovvolahttindoaimmaide. Dát leat čilgejuvvon Sámi allaskuvlla strategiijaplánas, stivrensignálain ja mearriduvvon mihtuin. Jus allaskuvla galgá lihkestuvvat kvalitehtabargguin, de ferte oahpuid kvalitehta diehtu ja árvoštallan ávkkástallojuvvo ásahusa plánemis. Gulahallan, systematihkka ja dokumentašuvdna galgá duddjot vuodu oahpuid kvalitehtabarggu dieđu birra. Guovddážis kvalitehtagulahallamis ja raporteremis galgá leat mainna leat lihkestuvvan ja mii ferte buoriduvvot/ovdánahttojuvvo, ja dán vuodul mearridit čuovvolahttindoaimmaid.

Oahpuid kvalitehta analyseren lea reaidun gávnnahtit joksá go Sámi allaskuvla mearriduvvon mihtuid. Dát lea maid reaidun gávnnahtit nákke go allaskuvla gieđahallat rievdadusaid ja hástalusaid maid rievdaduvvon rámmaeavttut ja rievdaduvvon gáibádusat oahpuide buktet. Analysa vuolggasadji lea ollislaš dokumentašuvdna, mas leat oassin sihke kvalitatiiva ja kvantitatiiva kvalitehtaindikáhtorat. Analysa dahkko dieđuid vuodul maid oažžut earret eará:

- Beaivválaš gulahallamis gaskkal studeantta, fágabirrasa ja hálddahusa
- Evalueremiiguin
- Studiebarometeret iskkadeamis
- Kandidáhttaiskademiin
- Studeantabirasiskkadeapmi
- Čoavddaloguin
- Spiehkastatdieđuin
- Fágaraporttain

Kvalitehtahedjoneapmi ja -olaheapmi raporterejuvvojit jahkásaččat kvalitehtaraporttas. Analysat addet gođiide, hálddahussii, dutkan- ja oahppostivrii, allaskuvlastivrii ja eará relevánta stivrraide ja lávdegottiide buori vuodu dahkat mearrádusaid ja bidjat johtui doaimmaid main lea dadjamuš oahpuid kvalitehtii. Raporttas mearriduvvojit váldovuoruheamit boahpte jahká. Doaimbajuid evalueren berre dahkkot allaskuvlla mihtuid vuodul ja maiddái NOKUT:a akkrediterema gáibádusaid vuodul.

Rolla	Ovddasvástádus
<b>Studeanta</b>	Searvá iešguđet evalueremiidda ja iskkademiide, buktá dieđuid eará heivvolaš kanálaid bokte ja dieđiha spiehkastemiid.
<b>Koordináhtor</b>	Bidjá johtui oahppoovttadaga evaluerema ja čohkke bohtosiid. Bohtosiid analysa ovdanbuktá koordináhtor fágaraporttas oktan iežas evalueremiin.
<b>Prográmmajodiheddji</b>	Bidjá johtui oahppoprográmmaevaluerema. Bohtosiid analysa ovdanbuktá prográmmajodiheddji fágaraporttas oktan iežas evalueremiin. Čuovvolahtte kvalitehtaanalysaid ovtta goahtejodihedjiin.
<b>Goahtejodiheddji</b>	Manná čađa ja árvoštallá evalueremiid gávdnosiid, árvoštallá makkár doaimbajuid galgá bidjat johtui. Čuovvolahtte kvalitehtaanalysaid ovtta prográmmajodihedjiiguin. Oahput main leat earenoamáš heajos bohtosat, galget oažžut earenoamáš fuomášumi. Goahti evttoha olgguldasevaluerema mandáhta áššedovdilávdegoddá ja ráhkada plána evalueremiidda.
<b>Oahppo- ja dutkanhálddahus</b>	Čuovvola ossodahkii guoskevaš bohtosiid evalueremiin ja ovddasvástida oahpuide guoskevaš spiehkastatdieđuid.  Čohkke fágaraporttaid, evalueremiid ja iskkademiid bohtosiid, ja čoavddaloguid. Čállá jahkásaš kvalitehtaraportta earret eará namuhuvvon dieđuid vuodul ja ovddida dan dutkan- ja oahppostivrii, ja allaskuvlastivrii.



<b>Hálddahušlaš ossodagat</b>	Čuovvolit ossodagaide guoskevaš bohtosiid evalueremiin ja ovddasvástitid ossodagaide guoskevaš spiehkastatdieđuid.
<b>Rektor/direktevra</b>	Galgaba čuovvolahttit kvalitehtabarggu eará jođiheddjiid gulahallamiin. Fokusis galgá leat mainna leat lihkestuvvan ja maid ferte čuovvolahttit, buoridit ja ovdánahttit. Kvalitehtaraportta bohtosat čuovvolahttojuvvojit maiddái jahkeraporttas.
<b>Dutkan- ja oahppostivra</b>	Dohkkeha loahpalaš mandáhta olgguldasevaluerema lávdegoddái. Sáhtá mearridit ahte allaskuvla galgá čađahit stuorát árvvoštallamiid prográmmain go leat unnimusat guokte joavkku (kulla) čađahan oahpu.  Meannuda ja ovddida allaskuvlastivrii jahkásaš kvalitehtaraportta ja dákko bokte doaibmabijuid boahte jahkái.
<b>Allaskuvlastivra</b>	Meannuda jahkásaš kvalitehtaraportta ja dákko bokte mearrida doaibmabijuid boahte jahkái.

## 7 Oahppoportefølje hálddašeapmi

Allaskuvlastivra mearrida oahpuid guhkesáiggeplána ja jahkásaččat makkár oahppoprográmmat galget álggahuvvot boahhte oahppojagi. Stivra árvvoštallá kvalitehtadimenšuvnnaid gustovaš láhkaásahusaid hárrái ovdal go oahppoprográmmat biddjojit johtui, dása gullá árvvoštallat resursadili, fágabirrasa gelbbolašvuoda, doarjjafunkšuvnnaid kapasitehta, ja ovddit jagiid rekruterema ja čađaheami bohtosiid.

Dutkan- ja oahppostivra ges mearrida makkár oahppoovttadagat galget álggahuvvot boahhte oahppojagi. Dutkan- ja oahppostivra mearrida sisaváldima rámmaid ja vejolaš ráddjema oahpposajii prográmma-, oahppo-, fága- ja máhttoviidodatplánaid dohkkehemiin. Dutkan- ja oahppostivra galgá árvvoštallat ahte oahput devdet gustovaš kvalitehtagáibádusaid, earret eará resursadili, fágabirrasa gelbbolašvuoda, doarjjafunkšuvnnaid kapasitehta, ja ovddit jagiid rekruterema ja čađaheami bohtosiid. Goajtejođiheaddjis lea ovddasvástádus árvvoštallat resursadili dainna ulbmilin ahte deavdá kvalitehtagáibádusaid ovdal go oahpu álgín ovddiduvvo dutkan- ja oahppostivrii. Dása gullá maid árvvoštallat doarjjafunkšuvnnaid kapasitehta.

Oahppoportefølje rievdadeamit main lea strategalaš váikkuhus ja ođđa oahpuid ásaheapmi, oahpuid heaittiheapmi dahje stuorát rievdadusat oahpuin galget gehččojuvvot ollislaš oktavuodas ja árvvoštallojuvvot allaskuvlla ollisalaš oahppoportefølje ektui. Oahppoportefølje rievdademiid mearrideapmi galgá sihkkarastit ahte allaskuvlastivrras lea doarvái vuodđu dahkat vuoruhemiid, dákko bokte mearridit makkár ođđa oahpuid galgá vuoruhit. Proseassa lea heivehuvvon našunála áigemeiriide, earret eará oktasaš sisaváldima oahpuid diediheami áigemearrái.

<b>Rolla</b>	<b>Ovddasvástádus</b>
<b>Oahppo- ja dutkanhálddahus</b>	Sádde gođiide dingojumi ođđa oahpuid ásaheami, oahpuid álggaheami ja oahppoportefølje eará stuorát rievdadusaid ektui.  Álggaha oahpuid guhkesáiggeplána barggu.
<b>Goajtejođiheaddji</b>	Buktá goađi evttohusa makkár oahput galget álggahuvvot boahhte oahppojagi. Ođđa oahpuid álggaheami oktavuodas lea dehálaš čielggadit mo plánejuvnon oahppu heive allaskuvlla strategiiaplánii ja mihtuide. Galgá maid čielggaduvvot mo fágabiras mii galgá čadnot ohppui deavdá NOKUT:a gáibádusaid.  Buktá goađi evttohusa oahpuid guhkesáiggeplánii, oktan resursačielggademiin.
<b>Direktevra</b>	Ovddidit allaskuvlastivrii áššiid ja mearrádusárvalusaid mat gusket oahppoporteføljii, nu mo mearridit oahppoprográmmaid ja oahpposurggiid.
<b>Allaskuvlastivra</b>	Mearrida oahppoprográmmaid álggaheami boahhte oahppojahkái ja ođđa oahpuid ásaheami. Mearrida stuorát rievdadusaid oahppoporteføljas.
<b>Dutkan- ja oahppostivra</b>	Mearrida oahppoovttadagaid álggaheami boahhte oahppojahkái. Mearrida prográmma-, oahppo-, fága- ja máhttoviidodatplánaid, ja dáid rievdamat.

## 8 Akkrediteren ja ođđa oahpuid ásaheapmi

Universitehta- ja allaskuvlálágas lea akkrediteren

(...)Akkrediteren ipmirduvvo dán lágas alitoahppoásahusa dahje oahppofálaldaga fágalaš árvoštallan departemeantta ja NOKUTa standárddaid ja eavttuid deavdima ektui. Akkrediteren lea eaktun alitoahpu fállamii. Akkrediterejuvvon oahppofálaldagat galget čuovvut Našunála kavifikašuvdnarámma(...)

Sámi allaskuvllas lea fápmudus álggahit ođđa prográmmaoahpuid bachelordásis. Masterdási- ja doavttergrádaoahpuid galgá NOKUT akkrediteret ja Máhttodepartemeanta dohkkehan álggaheami, ovdal álggahuvvot. *Studiekvalitetsforskrift og studietilsynsforskrift*, ja vejolaš eará gáibádusat maid ásahusa mearrida, galget leat vuodđun ođđa oahppofálaldagaid hábmemii ja álggaheapmái.

Akkrediterenproseassa galgá sihkkarastit ahte ođđa oahput leat bures vuodđuduvvon Sámi allaskuvlla strategiijaide ja mihtuide, ja ahte buot gáibádusat leat doarvái bures dokumenterejuvvon, árvoštallojuvvon ja gávnnavuvvon dohkálažžan ovdal oahppu ásahuvvo.

Rolla	Ovddasvástádus
<b>Oahppo- ja dutkanhálddahus</b>	Sádde gođiide dingojumi ođđa oahpuid ásaheami ja oahpuid álggaheami ektui.  Ovddida prográmma-, oahppo-, fága- ja máhttoviidodatplánaid dutkan- ja oahppostivrii.  Kordinere oahpuid akkrediteren- ja dohkkehanproseassa.
<b>Goahtejođiheaddji</b>	Buktá goađi evttohusa makkár oahpuide galgá ohcat akkrediterema ja makkár oahpuid galgá ásahit. Ođđa oahpuid álggaheami oktavuodas lea dehálaš čielggadit mo plánejuvvon oahppu heive allaskuvlla strategiijaplánii ja mihtuide. Galgá maid čielggaduvvot mo fágabiras mii galgá čadnot ohppui deavdá NOKUT:a gáibádusaid.
<b>Direktevra</b>	Fágalaš árvoštallama vuodul ovddidit allaskuvlastivrii áššiid ja mearrádusárvalusaid mat gusket mearridit oahppoprográmmaid ja oahpposurggiid álggaheami, dátko bokte árvoštallat leatgo guoskevaš gáibádusat NOKUTis, departemeanttas ja allaskuvllas devdojuvvon.
<b>Allaskuvlastivra</b>	Mearrida makkár oahpuid galgá ohcat oažžut akkrediterejuvvo ja ođđa oahppoprográmmaid ásaheami.
<b>Dutkan- ja oahppostivra</b>	Árvoštallá akkrediterenohcamiid ja oahpuid ásaheami. Jus gávnnavuvvo dohkálažžan, de ovddida dáid mearrideapmái stivrii.  Mearrida prográmma-, oahppo-, fága- ja máhttoviidodatplánaid, ja dáid rievdamá.

### Akkrediterejuvvon oahpuid rievdan

Akkrediterejuvvon oahpuid rievdamá oktavuodas galgá goahti ja oahppo- ja dutkanhálddahus dárkkistit ja sihkkarastit ahte buot gáibádusat leat áin devdojuvvon ja ahte rievdadusat eai gáibit ođđa akkrediterema.

Guoskevaš goahti ovddasvástida prográmma-, oahppo-, fága- ja máhttoviidodatplánaid rievdadeami. Jus rievdan mielddisbuktá ahte šaddá dárbu eambbo resurssaide dahje jus leat stuorát rievdadusat, de galget rievdadusat ovddiduvvot dutkan- ja oahppostivrii. Dutkan- ja oahppostivra lea juolludan goahtejođiheddjiide fápmudusa dohkkehit smávit rievdadusaid prográmma-, oahppo-, fága- ja máhttoviidodatplánain, ja dohkkehit iežas goađi lohkanmeari.

Jus oahppu evttohuvo rievdaduvvot nu olu ahte šaddá ođđasit akkrediterejuvvo, de galgá akkrediterenproseassa biddjot johtui. Oahppo- ja dutkanhálddahus kordinere dán proseassa.

Buot rievdadusat galget dokumenterejuvvot ja leat gávdnamis.

### **Oahpuid heaittiheapmi**

Oahpu heaittiheami oktavuodas galgá guoskevaš gohti árvvoštallan ja čilgen makkár váikkuhusat heaittiheamis leat studeanttaide geat leat álgán ohppui ja árvvoštallan njuolggadusaid heaittiheami oktavuodas. Árvvoštallamis galgá boahitit ovdan mo studeanttaid fágalaš beroštumit váldojit vuhtii. Direktevra ovddida fágalaš árvvoštallama vuodul allaskuvlastivrii ja dutkan- ja oahppostivrii áššiid ja mearrádusárvalusaid mat gusket oahpuid heaittiheapmái, dákko bokte árvvoštallat leatgo guoskevaš gáibádusat NOKUTis, departemeanttas ja allaskuvllas devdojuvvon. Oahppo- ja dutkanhálddahus koordinere akkrediterejuvvon oahpuid heaittiheami. Dutkan- ja oahppostivra mearrida oahppoovttadagaid heaittiheami ja allaskuvlastivra mearrida akkrediterejuvvon oahpuid heaittiheami.